
■ FRACZIUN PCD

Manchentà ina schanza

(cp) Il cussegl grond è s'exprimì cunter la pussaivladad d'introducir scolas medias d'informatica a las scolas medias privatas. Ord vista da la fracziun da la partida cristiandemocratica (pcd) en il cussegl grond ha el qua tras manchentà ina schanza.

La pussaivladad d'introducir scolas d'informatica en las scolas medias privatas va enavos sin ina incarica da deputà *Remo Cavegn*. Cun sia proposta ha el pretendì da la regenza ch'ella creeschia la basa da curreger la decisiun dal cussegl grond a la renunzia da crear ina scola d'informatica, ch'è vegnida prendida en il rom da l'examinaziun da structures e prestaziuns. La basa legala è d'adattar uschia ch'igl è pussaivel da manar en il Grischun ina scola d'informatica. L'incarica è vegnida dada a ses temp en la sessiun dal favrer 2013 cleramain cun 96:3 vuschs.

En il rom da la revisiun da la lescha da las scolas medias han ins perquai vulì dar la pussaivladad d'introducir scolas d'informatica a las scolas medias privatas. Schizunt tar la procedura da consultaziun è ina clera maioritad da las posiziuns da las partidas grondas stadas positiva visavi questa proposta. Durant la debatta en il cussegl grond ha la fracziun da la pcd rendì cleramain attent ch'i saja impurtant per las scolas medias privatas ch'ellas hajan en l'avegnir questa pussaivladad.

Il cussegl grond prenda cun sia decisiun a las scolas medias la schanza d'introducir scolas d'informatica ed uschia da crear ina purschida decentrala ed attractiva da scolar en las regiuns. La pcd avess beneventà fitg, sch'il cussegl grond avess dà a las scolas medias privatas questa pussaivladad. Quai fiss – tenor la fracziun da la pcd – stà ina schanza unica per scolar forzas da lavur qualifitgadas en la regiun. Deplorablamain ha il cussegl grond manchentà da surlaschar a las scolas medias privatas questa libertad. Insatge ch'è absolutamain nunchapibel per la fracziun da la pcd.